



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
01 Juñu 2018

**Komemorasaun Loron Internasionál Labarik:
JSMP husu atu aseguira proteasaun adekuadu ba labarik sira**

JSMP husu ba Governu no liuliu Governu Konstitusinal dawaluk atraves hosi instituisaun relevante sira atu aseguira proteasaun adekuadu ba labarik sira hosi kualker forma violénsia no abuzu seksuál hasoru labarik sira.

Iha kazu resente sira JSMP observa deskobre katak iha labarik sira entre tinan 3¹ no tinan 5² hetan ona abuzu seksuál grave hosi sira ninia membru familia rasik ka husi viziñu sira ne'ebé baibain hamutuk ho sira. Iha kazu barak liután ne'ebé envolve labarik fetu vítima sira entre tinan 9-11, maioria sofre abuzu seksuál hosi ema sira ne'ebé tuir loloos tenke proteze labarik sira ne'e iha sosiedade.

Rezultadu monitorizaun regular iha tribunál juridisaun sira hahu husi Janeiru 2017 no Dezembru 2017³ no Janeriu 2018 to'o Marsu 2018 iha juridisaun hotu iha Timor-Leste, hatudu katak kazu violénsia doméstika no abuzu seksuál ne'ebé envolve labarik sira hamutuk 73. Númeru ne'e reprezenta deit prosesu sira ne'ebé JSMP observa iha tribunál sira no JSMP fiar katak iha númeru barak liu ida ne'ebé lakonsege lori to'o mai sistema justisa formal.

“JSMP preukupa teb-tebes se la iha esforsu ida-ne'ebé estra-ordináriu hosi instituisaun relevante sira atu hakotu ka prevene violénsia potenciál boot liu hasoru labarik sira iha futuru. Kazu sira ne'ebé akontese hatudu tendénsia katak estadu falla atu proteze no promove ambiente ne'ebé segura no libre ba labarik sira atu goja sira nia direitu nu'udar labarik”, dehan Diretor Ezekutivu JSMP, Luis de Oliveira Sampaio.

JSMP hein katak liuhosi komemorasaun loron mundiál ba labarik, fó biban ba komponente sosiedade Timor-Leste tomak hodi hanoin no refilet saida mak presiza hametin di'ak liután iha futuru no hadok labarik sira husi forma violénsia no diskriminasaun hotu-hotu.

¹ Sumariu Kazu fulan Marsu 2018, Nú. 11 ho númeru prosesu: 0010/17. VQWTL; publikadu iha Marsu 2018 (http://jsmp.naroman.tl/wp-content/uploads/2018/05/Sumariu-kazu-Tribunal-Distrital-Baucau_TETUM.pdf);

² Komunikadu Imprensa JSMP: http://jsmp.tl/wp-content/uploads/2017/01/Final-PR-TDB-kondena-pena-prizaun-13_ba-kazu-abuzu-seksual-agravadu-JSMP-husu-investiga-klean_Final.pdf

³ Bele lee mós relatóriu Observasaun Jerál kona-ba Setór Justisa 2017 iha website: <http://jsmp.naroman.tl/publications/relatoriu/> no sumariu kazu Janeiru-Marsu 2018 iha ne'e <http://jsmp.naroman.tl/publications/sumariu-kazu/>

JSMP ezije ba orgaun estadu sira, liu-liu governu atu hari'í sistema no dezenvolve polítika ida ne'ebé responsivu hodi garante protesauun adekuada ba labarik sira nia direitu. JSMP mós husu Parlamentu Nasional, iha lejislatura foun atu halo alterasaun ba Kodigu Penál hodi hamosu artigu espesifiku kona-ba inestu sein hare ba idade nomos konsentimentu no tau iha prioridade ba Esbosu Lei Protesauun Labarik atu diskuti no aprova imediatamente.

Estadu Timor-Leste tenke kumpri ninia obrigasaun tuir Konstitusaun-RDTL no Konvensauun Internasional ba Direitu Labarik ne'ebé Estadu ratifika ona. Tantu Konstituisauun Timor-Leste ka Konvensauun Direitu Labarik garante katak Estadu iha dever atu asegura protesauun espesial hasoru hahalok hotu hanesan la tau matan, diskriminasaun, violénsia, abuzu seksuál no explorasaun.

Loron 1 Juñu kada tinan komemora nu'udar loron internasional ba labarik sira iha mundu nomos iha Timor-Leste. Loron internasionál ba Labarik ne'e importante tanba nu'udar rekoñesementu ida ba labarik sira hotu no atu asegura no promove respeita ba labarik sira nia direitu, atu hamutuk eforso hotu-hotu hodi prevene violénsia, diskriminasaun no abuzu seksuál oioin kontra labarik sira iha rai barbarak inklui Timor-Leste ne'ebé ikus-ikus ne'e hatudu tendénsia ameasa ne'ebé sériu hasoru labarik sira.

Relasiona ho komemorasaun loron importante ne'e, JSMP hakarak hato'o parabens ba labarik iha mundu tomak, liu-liu labarik sira iha Timor-Leste.

Atu hetan informasaun kle'an favor kontaktu direitamente:

Luis de Oliveira Sampaio
Diretór Ezekutivu JSMP
Diresauun e-mail: luis@jsmp.tl